



Cent'unu annus funt medas e de cosas at acutu a ndi biri diaveras Tziu Massiminu, bellas e lègias puru. Chi fessit de ddas sa scriri, no dd'iat a bastai unu libru interu.

Fiat su 22 de friaxu de su 1911 candu est nàsciu Massimino Margini e is tempus no fiant comentis a oi: a is poburus tocat una cosa feti... a traballai de mengianu a meri, de su lunis a su domìnicu, sena pausu. E Massiminu teniat apenas set'annus candu su babbu dd'iat agordau comentis a serbidoreddu de Tziu Arrichetu Spiga. Issu

dd'iat pigau sa manixedda e dd'iat donau una petiedda. A s'atra manu dd'iat acapiau una tiallora cun in mesu unu incorradeddu de pani e casu po murtzai. Totu a pei fiant andaus in dd'unu satu de bidda nostra, *Genna Corus - Nuraxi de Molas*. Ddu su sighiàt una baca chi Massiminu depiat fai pasci... a solu. Ci fiat s'erba arta prus de issu e si fiat acostau un'òmini chi dd'iat domandau chini iat abruxiu cussu una moba de modditzi. Issu, pipieddu, iat timiu diaratzta poita dd'iat nau ca ddi tzerriàt is carabinieri...Aici ndi fut torrau a domu sena baca, currendi. Fiat passau de su meri e, a iscusu, iat torrau sa petiedda. Arribau a domu sa mamma ddu boliat atripai e issu, torrada a pigai sa petiedda de a su meri si nci fut andau a su satu. Arribau aundi iat lassau sa baca, si fiat acatau ca iat pèrdiu sa tiallora e no teniat prus nudda de papai e ca atrus piciocheddus dd'iant pigau sa baca. Ita podiat fai? Sceti prangi. Issus, po ddi torrai sa bachixedda cosa sua, dd'iant domandau is butonis de sa giachixedda chi portaiat e de is prantalloneddus puru e Massiminu si ddu siat donaus. E candu a meri fiat torrau cun sa baca, ma sena butonis e cun is prantalloneddus acapiaus a

erba de satu, si fiat fatu una bella cadra de sa mamma e intamis ca no ia pràndiu, dd'iant mandau a letu sena cenai puru. Si dd'arregordat comentis fessat ariseu cussa primu giorrunnada in su satu, mancai siant passaus norantacuatr'annus apenas...! Apustis Massiminu s'est coiau sa primu borta a trint'annus, ma est abarrau solu noi mesis apustis poita sa pobidda fut morta de partu. Cun sa segunda pobidda, Pasqua Pusceddu, invècias, sa sorti est istada prus bona e ant passau impari prus o mancu setant'annus. Otu is fillus, Giuliana, Nelso, Cesario, Francesco, Remiro, Alberto, Evenanzio e Marilena, e catodixi is nebodis chi ant donau prexu a custa coia chi at



superau una guerra mondialis, fàmini, poburesa e disterru. Apustis de ai traballau

comenti a serbidori in terras allenas po tant'annus, iat agiudau a ghetai DDT e arsenicu me is coras e me is domus po bocìri sa zanzara, su priogu e su pipitziri chi ci fiant a muntonis in Sardìnnia e portant unu iaxi de maladies, a cincuant'annus Massiminu e Pasqua, po agatai traballu e nodriai sa familliedda, funt partius a Milanu, issu a fai su manoba, issa a servìtziu. Inguni funt abarraus fintzas a su 2009 candu funt torraus in sa terra insoru, in Baressa. Prus o mancu de duus annus Massiminu est torrau a abarrai fiudu, ma no est mai solu: bivit in sa Comunità Allògiu de Baressa, aundi totus ddi bolint beni meda. Mèrcuris 22 de friaxu po fai festa cun issu e dd'agiudai a studai is 101 stiaricheddas de custa turta aici ispeciali c'at a essi sa famiglia sua, is amigus de sa Comunità allògiu e su sindigu Piergiorgio Corona puru, ca cun dd'unu matzu de froris at a fai is augùrius cun prexeri mannu a Tziu Massiminu, s'ajaju de bidda nostra. "S'annu passau est istada una bella festa", aciungit cun dd'una castiada scadralluta e prexarosa, "e custa borta puru m'iat a praxi a fai festa...ocannu e s'annu chi benit puru chi Deus bolit...E po totus is Baressesus

unu feti s'augùriu: chi têngiant tanta bona sorti e tant'annus de vida assumancu comenti a mei!!

Novas Baressesas at a bessiri prus o mancu una borta a su mesi e s'at podi arriciri inderetura in domu, cun una e-mail: bastat a ddu pediri mandendi una punta de billetu eletrònicu a s'indiritzu serviziocultura@comune.baressa.or.it iscriendi su nòmini, su sangunau e "bollu arriciri Novas baressesas".

In prus, s'at podi ligi puru in sa bacheca comunali o agatai in medas atividades comercialis de sa bidda o in sa biblioteca comunali

Sa redazioni de Novas Baressesas est contivigiada de su Servìtziu linguisticu sardu e de s'Assesorau a sa Cultura de su Comunu de Baressa.

S'isportellu linguisticu est a disponimentu de tzitadinus, maistus de iscola, professoris e istudentis po cali si siat informatzioni, fundamentu, duda, crosidadi, bibliografia, sitografia asuba de sa lingua sarda, po consulèntzias didàticas e po contzillus chi pertocant is arrègulas de iscritura de su sardu.

Su Servìtziu est abertu po su mesi de Friaxu:

	de	a
Mèrcuris 01	8.00	15.00
Mèrcuris 08 – 15	10.35	15.05
Lunis 27	09.30	15.00
Mèrcuris 29	11.35	15.05



Comunu de Baressa
Provintzia de Aristanis



**Novas
Baressesas**

☎ 0783-930049 Fax 0783-930118
e-mail: info@comune.baressa.or.it

Newsletter periòdica de informatzioni istituzionali de su Comunu de Baressa

Responsabilitadi e proprietadi de su Comunu de Baressa (or)

Annu II, n. 2

Acabbau su 16 de Friaxu de su 2012

EDITZIONI ISPETZIALI !